

# ETHDIARI

Numerò 13  
Diuèndres 22 de gèr 1999

HUELHETON

DIARI

D'ARAN

Prètz: 50 pessetes

## “JOSU TERNERA” ENA COMISSION DE DRETS UMANS DETH PARLAMENT BASC

José Antonio Urrutikoetxea, coneishut per "Josu Ternera", presoèr preventiu pera sua presumpta vinculacion damb ETA e parlamentari d'EH des des eleccions deth darrèr 25 d'octobre, serà un des representants dera plataforma "abertzale" ena Comission de Drets Umans deth Parlament basc, amassa damb Jone Goirizelaia e Arnaldo Otegi, segontes an informat hònts d'aguesta formacion.



Eth grop parlamentari barrèc aguesta setmana era distribucion des sòns membres enes 14 comissions dera cramba basca, en tot méter en sies d'eres as dus deputats autonòmics presoèrs preventius, José Antonio Urrutikoetxea "Josu Ternera" e José Antonio Etxeberria serà present, ath delà der organ parlamentari dedicat a Drets Umans, en d'Ahèrs Europèus e Accion Exterior, que compartirà damb Esther Aguirre e Arnaldo Otegi, e Ensenhament e Cultura damb Aurkene Astibia e Jon Salaberria.

Atau madeish, Etxeberria, prenerà part enes comissions d'Agricultura e Pesca, Ordenacion Territorial, Transpòrts e Miei Ambient, amassa damb Pablo Gorostiaga e Iñaki Antigüedad, e ena d'Incompatibilitats damb Rakel Peña e Iñigo Iruin.


Andús cargues escuelhudi complissen preson preventiva en Alcalà Meco (Madrid) e actuaments son en centre penitenciari de Nanclares dera Ôca (Alava), a on sigueren trasladats entà assistir ath plen d'investidura deth lehendakari Juan José Ibarretxe.

(Reaccions/darrèr)

## XAVIER CARDONA DEISHARÀ ETH LIDERATGE DETH PARTIT POPULAR ARANÉS

Hònts ben informades mos diden que Xavier Cardona, banquèr, empresari d'ua botiga de ferreteria e presents, e còsso der Ajuntament de Vielha, deisharà proximament eth cargue de maxim responsable deth **Partit Popular Aranés**. Eth Sr. Cardona, treballador nat, segurament qu'a arthenut eth maxim de trèir eth chuc as 24 ores deth dia treballant, e ara eth prètzhèt li acapare tota era sua atencion. Èster client abituau deth pònt aèri de Madrid -lèu tres viatges ara setmana que l'utilise- li comence a representar ua pesada activitat qu'a de conjugar entre es anades entàs sedences deth partit (Val d'Aran/Lhèida/Barcelona e Madrid), es hèires comerciaus e es amassades. Es nòstes hònts diden qu'ei fatigat e que vò eth cambi. Uns auti des sòns companhs, tamb mès ironia, diden que serà bon aguest relhèu entà cambiar era imatge deth PP ena Val, en sintonia tamb eth viratge centrista deth partit: "serie tota ua leçon entà Pepito qu'es de mieja edat dera oposicion der Ajuntament se retirèssen en casa entà dar pas as joeni".

## TOT LES QUE DITZ ADIU A TÒNHO



Un bon corròp de gent silenciosa, respectuosa e emocionada qu'acompanhèc era tarde d'ager es despulhes de Jusèp Antòni Boya, *Tònho des Banhs* coma se le coneishie popularament, ena ceremonia deth sòn enterrament ena glèisa de Les e, posteriorament, en cementèri d'aguesta poblacion.

Amics e familhars portèren ena esquia era caisha mortuòria en processon enquiara glèisa, en tot que les precedie era forgoneta dera funerària ben plia de coronas e rams de flors.

Toti es vesins de Les, fòrça personas de d'auti pòbles dera Val e, sustot, molta joenessa aunorau respectuosament aguest joen, de trenta ans, qu'en un malurós accident perdec era vida ena montanha.

Mossèn Jusèp Maria oficièc tota era ceremonia e reconhortèc -en public e en privat- uns solids puntaus dera parròquia, Danièl e Juanita, pairs deth hilh defunt, e ac hec coma podec, mès tamb eth convençut messatge des creienti.

Tònho qu'èr estimat en Les. Era sua illusion èr era çaça,

e tanben eth sòn bestiar. Es vaques e es shivaus li dauen trabalh, mès tanben fòrça satisfaccions. De trenta vaques, ara n'auie sies d'aminades e quate mès que n'èren dejà prèstes. A nosati coma periodistes non mos costèc pas guaire de trobar ciutadans de totes es edats que repetien çò de madeish en tot parlar de Tònho: "èr plan bona persona, serviciu e totemp hège favors", "tostemp qu'èr alegre", "hège remoquets", "toti l'estimàuem".

E ce qu'Antòni tanben èr: un çaçaire de prumèra.

Es hèts son coneishudi, tot e que quauqui detalhs s'an condat e escrit malament.

Er episòdi comence dimars, quan Tònho, sa pair, sa frair e eth sòn cunhat çaçauen sanglièrs en Arres de Sus. Dempús dera batuda e desseparà-se deth grop entà anar a cercar es pèces qu'aucic, Antòni ja non tornèc. Des quate dera tarde enquia es ueit deth ser eth grop de familhars que sagèc de localisà-le. En tot véder que non le podien trobar avertiren as pompièrs.

Siguec un equip de dètz pompièrs -sies de Vielha, un de Bossòst e tres de Les-, qu'amassa tamb amics de Les e

d'Arres realisèren era batuda, que siguec positua, en tot trobar eth còs d'Antòni, caperat de nhèu, entàs quate dera maitiada.

Tot hè a pensar que siguec enterrat per un laueg de nhèu, queiguda des d'ua còta de 2.200 mètres, en tot qu'eth joen çaçaire èr enterrat en ua còta de 1.650 mètres. Donques recebec un fòrt truc d'un bon celh de nhèu des d'uns 500 mètres, tamb era caracteristica qu'èr ua nhèu gelada, mortau.

Entàs nau deth maitin un membre dera Guàrdia Civi, delegat peth jutge, hec er auçament legau deth cadavre. Açò mos hè desmentir, çò que s'a dit, qu'ena recèrca i participèren agents deth Grop de Rescat de Montanha dera Guàrdia Civi.

Eth lòc a on i auie eth cadavre èr de plan mau accès; per açò se triguèc tant en hèr er auçament deth cadavre e siguec de besonh un elicotèr entà arribà-i e portà-le, posteriorament, entath tanatòri der espitau de Vielha.

Com didien es coronas e rams deth pair e era mair, era des amics e era des çaçaïres d'Aran: te rebrembaram!

Eth pròplèu dia 25 de gèr que comence eth

### CORS DE GESTION COMERCIAU E ATENCION ATH CLIENT

Centre d'estudis  
VIVÈNCIA ARANESA:  
Aula Euròpa des Pirenèus

telefon 973 641772

Cors de reciclatge amiat entàs professionals joeni e adults que volguen aprèner es tecniques mès modèrnes dera comunicacion e venda. Cors de 20 ores, de deluns a diuèndres pendent dues setmanes (deth 25 de gèr enquiath 5 de hereuèr). Des 19 enquiath 21 ores enes locals deth centre en Vielha. Professor: J-R Colomines-Companys (Es classes seràn en catalan). Entà inscripcion e matricula cau trucar pes tardes ath telefon 973 64 17 72.

